

Cu hopi emocion a recorda 30 aña di Himno y Bandera



STA. CRUZ-- Ayera nochi Gobierno di Aruba a cuminsa celebra su dia di Himno y Bandera cu a cuminsa cu un caminata di flambeau cu a sali for di dilanti di Djispi's Place na Playa y a yega Compleho Deportivo Guillermo Prospero Trinidad. Esaki tabata hopi bunita. E efecto den e scuridat tabata impresionante, recordando aña 1975 unda Betico a cuminsa su marcha pa libertad di nos pueblo. Un marcha cu nos por bisa cu a pone hopi hende corda ariba añanan atras dia cu Aruba a haya su propio Himno y Bandera. Na yegada e bandera cu a ser hisa 30 aña pasa a ser carga pa e generacion hoben di 30 aña pasa cu ta Angelique Croes y Anthony Croes. Nan a bira awor e generacion grandi cu a pas'e awor pa e generacion nobo cu ta Sheandrick Tromp y Sheandrick Tromp cu ta ruman morochu di 5 aña. Nan a hisa e bandera hunto cu e Verkennerij y e himno di Aruba Dushi Tera a ser canta pa e ex-cantantenan di Coro Tutu Fruty di Maybeline Arends cu a canta e Himno di Aruba 30 aña pasa. Tambe e grupo di Maybeline di e muchanan di awor a interpreta 3 cantica y e muchanan di diferente school a canta un bunita cantica cu a ser dirigi pa Maybeline Arends-Croes. Den un obra teatral e paloma a ser presenta como e paloma cu a sali en busca di libertad.

Minister Ramon Lee a presente un bunita discurso padilanti pa tur es nan presente y despues nos Prome Minister di Aruba a conta y recorda e 30 añanan atras di tempo e tabata Diputado di Cultura di e gobierno insular. E parti mas emocionante ta na momento cu un video a ser presenta di e manifestacion di 30 aña pasa unda Betico Croes a duna su discurso. Esaki a pone tur hende para keto y recorda e momento aki. E comision organisador a trece un tremendo show di vuurwerk cu un pabien Aruba den un diseño di Vuurwerk y sin lubida un bunita clausura cu coreografia di Freddy Montoya y baile di Popcorn dancers.

Cu un vuurwerk y show Aruba a disfruta di e gran anochi aki. Pabien na comision 50 aña pa e bunita trabao hunto cu CCND.

